

Wozjewjenja na 24. přezlětnej njedźeli (13.09.2020)

1. Džensa w 14.00 hodź. je nyšpor. Wšitcy wosadni su wutrobnje přeprošeni.
2. Wutrobne zapłać Bóh tón Knjez młodostnym, kiž su na swjedženju Marije naroda postawu Maćerje Božej jako družki w prócesijónje njesli abo druhe služby wukonjeli. Njeh nazhonjeja z toho bohate Bože žohnowanje.
3. Firmowanska wučba započina so zaso wot jutřišeje pónđzele, dnja 14. septembra.
4. Swjate firmowanje planuje so tučasnje w Radworju za sobotu, 10. oktober. Boža mša budže w 9.30 hodź. a džakny nyšpor w 14.00 hodź.
5. Džěćace kemše su zaso prawidlownje štwórtk w 14.00 hodź.
6. Wšitke džěći, kotrež chcedža so z ministrantami stać, njeh so prošu pola fararja přizjewja.
7. Swójbny kružk přeprošuje tež lětsa zaso wšitke swójby a zajimcow našeje wosady na zhromadny wulět. Tutón budže sobotu, dnja 19.09.2020. Lětsa chcemy so – kedžbu změna - do Klóštra Marijineje hwězdy w Pančicach-Kukowje podać. Zetkamy so w 14.30 hodź w Swinarni. Přinjesće sebi prošu něšto k swačini sobu, wječor wuklinči kaž přeco ze zhromadnym grilowanjom na farskej zahrodže. Njezabudźće na škit za nós a hubu. Bychmy so wjeselili, jeli so prawje wjele swójbow za wulět přizjewja. Přizjewjenske lisćiny namakaće tu we cyrkwi, kaž tež w džěćacym domje. Prošu zapisajće so hač do najpozdžišo jutřišeje pondzele.
8. Njedźelu, dnja 27. septembra 2020 swjećimy w našej wosadže domchowanku. Dla korona pandemije njebudže lětsa zhromadna Boža mša w 9.30 hodź. a tež nic bjesada a zabawa na farskej zahrodže. Po zwučenym wašnju wuhotuje naš džěćacy dom serbskorěčnu Božu mšu w 9.00 hodź. a wupyši wołtarnišćo. **Zběrka při durjach je za našu pěstowarnju postajena.** Prosimy wo šćedriwe dary. Dokelž njeprizamknje so lětsa korony dla wosadny swjedzeń prosimy wšitkich, žohnowane korbiki z płodami po kemšach zaso sobu domoj wzać.
9. Njedźelu, dnje 22.11.2020 budu we wosadže wólby noweje wosadneje rady a wosadneho předstojicerstwa. Na njedźelomaj, 20.09. a 27.09. prosimy wo Waše namjety kandidatow za wobej gremijaj. Za to budu so cedlki wudželeć. Dla korona pandemije prosimy Was sej swójski pisak sobupřinjesć. Za wosadne předstojicerstwo smědža kandidatow namjetować a potom tež wolic wšitcy wosadni wot 16 lět. K wólbam stajić pak móžeja so wšitcy wosadni wot 18 lět. Za wosadnu radu smědža kandidatow namjetować a potom tež wolic wšitcy wosadni wot 14 lět. K wólbam stajić pak móžeja so wšitcy wosadni wot 16 lět.